

**Pisortat namminersortullu suliffeqarfiini atorfinerlaat 30-it inorlugit ukiullit tamarmik kiisalu atorfinerlaat killilimmik pisinnaasallit tamarmik qaammatini arfinilinni siullerni atorfeqarnerminnut atatillugu siunnersorteqartinneqalissappata/ikorfartorteqartinneqalissappata tamatuma iluaqutissartai ajoqutissartaalu allaaseralugit Naalakkersuisut nassuiaasioqqullugit peqquneqarnissaanik Inatsisartut aalajangiiffigisassaattut siunnersuut. Taamatut aaqqissuussisoqarpat tamatuma pisortanut namminersorlutillu inuussutissarsiteqartunut qanoq akeqarsinnaaneramik naatsorsuinernik nassuiaat imaqassaaq. (Inatsisartunut ilaasortaq Anna Wangenheim, Demokraatit)**

### **Akissuteqaat**

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq)

### **Siullermeerinninneq**

Naalakkersuisut sinnerlugit Inatsisartunut ilaasortap Anna Wangenheimip atorfinerlaat 30-t inorlugit ukiullit aamma piginnaanikitsut tamarmik siunnersorteqartinneqalissappata tamatuma qanoq akeqarsinnaaneramik naatsorsuinernik nassuiaateqarnissaaq pillugu siunnersuutaanut qujassuteqarniarponga.

Siunnersuisartooq tassaavoq inuk misilittagaqartooq, atorfinerlaamik, ilinniartumik imaluunniit ilisimatusartumik piffissami tapersersuisoq ilitsersuisorlu. Siunnersuisartup ilisimasani suliamullu paasisimasani atorlugit atorfinerlaaq suliassanik, siusinnerusukkut pineqartup suliarisinnaanngisaanik, aaqqiiniarnermi ikiutissaq.

Danmarkimi nunanilu allani siunnersuisartunut pikkorissaanerit arlalinnik peqarpoq, ilaatigut ug.dk-mi nassarineqarsinnaasut. Nittartakkat allat amerlasuut pikkorissaanerit assingusunik neqerooruteqarput, aamma suliassaqarfinni assigiinningsuni atorfinerlaanik qanoq pitsaanerpaamik tikilluaqqusinissaaq pillugu isumalluutunik annertuunik pissarsisoqarsinnaavoq. Atuarfiit, ilisimatusarfiit, højskolit suliffeqarfiillu soorlu napparsimaviit amerlanertigut namminneq siunnersuisoqartarput. Kalaallit Nunaanni aamma nalinginnaasuvoq pisortat suliffeqarfii sulilerlaanut siunnersuisoqarnermik neqerooruteqartartut, amerlanertigut HR-imik immikkoortotaqarfik aqutugalugu aaqqissuunneqartarluni. Assersuutigalugu Ilisimatusarfik siunnersuisartunik aaqqissuussaaqarpoq, sivisunerusumik ilinniartut ilinnialerlaanik ilitsersuisarlutik.

Siunnersuisoqarneq nunani amerlasuuni pingaaruteqartut akuerisaavoq, aamma kattuffiit atorfinerlaanut siunnersuisartut qanoq pitsaanerpaanngortinneqarsinnaanersut pillugit siunnersuisarput. Siunnersuisoqarneq pillugu aamma ilisimatusarnikkut allaatigineqartut amerlapput. 2012-imi Roskilde Universitetimi Ph.d-inngorniut, nunani killerni innuttaasunik atugarliortunik siunnersuisoqarnermik misissuisoq, soorlu inunnut piginnaanikitsunut. Taamaattoq mianersoqqusivoq siunnersuisuuneq tatigeqatigiinnermik tunngaveqanngippat, immikkoortinneqarnerat suli annertunerulernissaanut aarlerinaateqarsinnaasoq. Akerlianik tatiginartumik siunnersuisutut atuuffeqarneq inuiaqatigiinnut tamakkiisumik peqataalernissamut siuariartortinnissaannut ikiuutaasinnaavoq. Kisianni siunnersuisup sunik ikiuisinnaanera killeqarpoq, aamma inuit piginnaanikitsut ikiornissaat iluatsinngippat,

siunnersuisuunerup naammassinissaa ajornarsisinnaavoq imaluunniit ajornarsilluinnarluni, siunnersuisummi ilaat piginnaasaqarluartut iluatsinngitsoorsinnaammata.

Pingaaruteqarpoq inuusuttunut aamma inunnut piginnaanikitsunut siunnersuisutut aaqqiissutit immikkoortinnissaat. Atorfinerlaat inuusuttut siunnersuisunik misilittakkanik suliamilu paasisimasaqarnermik avitsisinnaasunik atorfissaqartitsipput, inuillu piginnaanikitsut siunnersuisunik, pisariaqartitaat immikkut ittut tapersersornissaannik sungiusarsimasunik atorfissaqartitsillutik.

Suliffimmik sungiusarnermut ilitsersuinermik pikkorissaanerit pisortat ataatsimut piginnaasanik ineriartortitsinerisa ilaattut neqeroorutigineqarpoq. Peqqissaanermik Ilinniarfik aamma sundhedsassitentinit suliffimmik sungiusarnermut ilitsersuinermik nammineq pikkorissaasarpoq. KISII-p (Kalaallit nunaanni inussutissarsiutinut sammiveqartumik ilinniartitsisussatut ilinniartitaaneq) suliffimmi sungiusarnermik ilitsersuisunut isumasioqatigiinnerit ingerlattarpai.

Nunatsinni Suliffeqarnermut Siunnersuisoqatigiit ulloq 23. september 2024-mi ataatsimiinneranni siunnersuisoqatigiit pingaanerpaatut oqariartuutigaat, atorfinerlaat 30-t inorlugit ukiullit aamma piginnaanikitsut tamarmik siunnersorteqartinneqalissappata iluaqutissartai ajoqutissartaalu pillugit nassuiaasiornani, suliffimmik sungiusarnermut ilitsersuinermik pikkorissaanerit annertunerusumik atorneqassasut aamma ingerlaavartumik neqeroorutigineqassasut. Tamanna ilinniartunut suliassaqaqarfinni namminersortunut aamma pisortat suliffeqarfiutaannut iluaqutaassaaq, ilinniarfinni naammassinnittarnermut procenti annertusinissaanut tapertaasinnaammat.

Naalackersuisut suliffimmik sungiusarnermut ilitsersuinermik pikkorissaanerit annertunerusumik atorneqarnissaat aamma ingerlaavartumik neqeroorutigineqarnissaat pillugu Nunatsinni Suliffeqarnermut Siunnersuisoqatigiit inassuteqaataat isumaqataaffigaat. Suleriaasioreerpoq pisortat suliffeqarfiutaanni suliffeqarfinnilu amerlasuuni sulilerlaanut siunnersuisutut aaqqiissutinik neqerooruteqartarneq. Tamanna tunngavigalugu Naalackersuisut inassutigaaq siunnersuut itigartitsissutigineqassasoq qulaani tunngavigisat innersuussutigalugit.